

GUK EUSKARAZ

Abenduaren 3an ospatzen da Euskararen Eguna.

Beste data batzuetan, literatura asteak edo kultura asteak antolatu ohi dira hainbat ikastetxetan.

Korrika ere etortzen da gure herrira bi urtez behin.

Emanalditxo bat prestatuko dugu gure ikastetxean eskaintzeko.

Horretarako, hizkuntzari buruz jarritako bertsoekin gozatuko dugu lehenik, eta errimari erreparatuko diogu.

Has gaitezen kantari!





**Xabier
Paya
Ruiz**



AMARI GALDEZKA



Doinua:
Esnesaltzailearena
Hamarreko txikia (7/6 silaba)

Ama, ni zergatik naiz
bi hizkuntza lasai
hitz egiteko gai?

Elebidun egin nahi
baitzintudan, Unai,
munduan ibiltzeko
kontent eta alai
gastelaniaz eta
euskaraz ere bai...
Zuretzako onena
baino ez nuen nahi.

Ama, lar ez ote da
bi jakin beharra?

Aski da bakarra!

Unai, bihur ezazu
hizkuntza txamarra:
Saihesteko elurra
edo kazkabarra,
bakar bat ez ote da
aukera kaskarra?
Hobe hartzea xira
ta forro polarra.

Ama, ez dut euskaraz
egiten tarteka
kostatzen zait eta!

Pentsa hizkuntza dela
zure bizikleta:
Astero eman ezik
dozena bat buelta,
gero ta urrunago
izango du meta,
herdoildu egiten baita
ganbaran gordeta.

Guztiok bi hizkuntzak
ikasi ezean

gu bion antzean?

Biak dakizkigunok
geronen etxean
ez dugu aukerarik
izango hitzean
eta hasiko gara
erdara hutsean
aurrekoaren lehen
hitza aditzean.



GAIARI LOTUTAKO OINAK



Goazen bigarren bertsora: **hizkuntza txamarrarekin konparatzen du** Xabier Payak.

Idea hori indartzeko, txamarrarekin lotutako oinak erabiltzen ditu bertsoan.

Ikus dezagun ea hala den!

Tximeletaren hego batean multzokatuko ditugu **txamarrarekin** edo eguraldi petralarekin zerikusia duten oinak.


Beste hegoan, eguraldiarekin zerikusirik ez duten oinak.



Hirugarren bertsoan **hizkuntza bizikletarekin konparatzen du**.

Idea hori indartzeko, bizikletarekin lotutako oinak erabiltzen ditu bertsoan.

Ikus dezagun ea hala den!





**Jon
Maia
Soria**



SUSTRAIEI AGURRA



Doinua:
Gaztalondo handian
Berezia (9 puntukoa)

Gutako askoren senideak beste herri batean jaioak dira, edo beste hizkuntza batean mintzo dira. Hara Jon Maia Soriak zer agur eskaini zien bere senideei.

Saioa: Txapelketa Nagusia / Urtea: 1997 / Bukaerako agurra

Ama Extremadura,
aita Zamoratik,
abuela ta abuelo
haien aurretik;
herri hontan sustraitzen
asmatzeagatik,
neuk'e maita dezaket
guztien gaintik.
Euskeraz badakit,
bertsoz darabilkit,
dena zuengatik,
halaxe dagokit,
denek kantatu dute
nere ahotik.

Bertso neurririk luzeena: 9 puntukoa



Azpimarratu bertso honetako oinak: ea denak aurkitzen dituzun!

*Pista bat: 9 puntuko bertsoa da. Beraz, zenbat oin aurkitu beharko dituzu?

Zer eskertu nahi zien?



Txapelketako agurra baliatu nahi izan zuen Jonek bere senideei zerbait eskertzeko. Zer eskertu nahi zien? **Azpimarratu** bertsoan!



ABUELA MARIA LUISA



Taldea
Pirritx eta Porrotx



Doinua:
Abuela Maria Luisa
Kopla (3 puntukoa)

Amonari kantu hau ere eskaini zion Jonek.

Geranioa loretan dela, (Bis)
ikastolatik banatorrela
leihoan zain daukat abuela.

Hain da luzia Andaluzia,
han da hizketa berezia,
hangoa du bere grazia!

Beti oroitu arren gure abuelita Maria Luisak
Andaluzia eta olibondoen geriza,
maite du trikitixa!

Herritik urrun, bihotzak pena, (Bis)
gaztea zinen, guapa, morena,
hartu zenuenean trena.

Triste heldu arren Euskal Herrira,
zure begiak piztu dira
gure mendiei begira.

Beti oroitu arren gure abuelita Maria Luisak
Andaluzia eta olibondoen geriza,
maite du trikitixa!

Irriak diz-diz ezpain ertzean, (Bis)
iloba denok zure etxean
zuri euskaraz kantatzean!

Nahiz ta hizkuntza ez den berdina,
aspaldi duzu lagun mina
gure amona Joxefina.

Beti oroitu arren gure abuelita Maria Luisak
Andaluzia eta olibondoen geriza,
maite du trikitixa!

Zure zartagin eta lapiko, (Bis)
zure lur eta zure herriko
usain ta zapore magiko.

Kontu kantari sillan jarrita,
gure etxeko lore polita,
maite zaitugu abuelita!

Eta etorri zenetik maite du gure trikitixa,
Andaluzia eta olibondoen geriza,
Abuela Maria Luisa!

Oinak hautatu egiten dira

Kantua Maria Luisari eskainita dago. Eta azken estrofan, hiru oin hauek hautatu ditu bertsolariak:

Eta etorri zenetik maite du gure trikitixa,
Andaluzia eta olibondoen geriza,
Abuela Maria Luisa!



Zergatik, justu, hitz horiek? Zer mezu eman nahi digu?



**Josu
Landeta
Egurrola**



HIZKUNTZEN PATIOA



Doinua:

*Txakur txiki polit bat
Zortziko txikia (7/6 silaba)*

Eskolan asko gara beste herri batetik etorriak. Aniztasuna, gure aberastasuna!
Egin dezagun zerrenda: zenbat hizkuntza dakizkigu eskolako lagun, guraso eta irakasle guztion artean?



Josu Landetak sorta hau eskaini die eskolan elkartzen diren hizkuntzei.
Bertsoei oinak falta zaizkie. Ea puntu bakoitzean oin egokia hautatzen dugun!

Maroko, Errumania
Peru, Kolonbia,
Paraguai, Errusia,
Txina, _____
Urrundik etorrita
lagun sorta _____
elkarrekin gabiltza
egiten _____

Oinak:
handia habia Bolivia

Hegan doan txoria
egin da pausatu,
herri honetan etxea
behar dugu _____
Eskolan gabiltzanok
ez gara lau _____
batera jolasteak
pozik jartzen _____

Oinak:
gaitu katu altxatu

Gorri, berde, hori eta
urдинen lilura,
jauzi alaietan goaz
margoen _____
Begira inguruan
daukagun _____
patio bakarrean
hamaika _____

Oinak:
kultura mundura freskura

Diz-diz ageri dira
gauean izarrak,
errumaniera eta
txineraren _____
arabieraz datoz
uhinen _____
ez ditzala estali
hizkuntza _____

Oinak:
bakarrak garrak aparrak

Hitza eta ekintza
bizitzaren zuku,
eguzkiak izotza
noiz behar du _____ ?
Euskaraz badakizu
ez ibili _____
bertoko hizkuntza ere
lagun min _____

Oinak:
bihurtu urtu mutu

Nagusiak lanean
umeak jolasten,
maldan gora gabiltza
lur honetan _____
Gogoz ibiliz gero
elkar _____
laster hasiko gara
gailurra _____ !

Oinak:
ikusten hezten aberasten



NIRE HERRIAN



Doinua:

"El dolor de los dolores"
Kopla berdina (8/8 silaba)



Aitor
Arrutia
Azkueta

Idoia
Anzorandia
Kareaga

Herri batzuetan gutxi gara euskaraz hitz egiten dugunak kalean, eta xomorro-berde sentitzen gara askotan! Inoiz gertatu al zaizkizu kopla hauetan kontatzen diren bezalako egoerak?

Euskara daukat ahoan
niretzat da hain **normala**,
baina begiratzen naute
estralurtarrei **bezala**!

Amak eskolan esan dit:
"ondo pasatu **laztana**!"
Ta kolegek flipatuta:
"Habla euskera tu **ama**???"

Pentsatzen dute euskara
aprobatuko **dudala**,
baina ez dut ezer ikasi
gainontzekoek **bezala**.

Nahiz ta ez izan oso ona
berez egiten **bertsoak**,
klasean kriston pelota
dit **bertsolaritzakoak**.

Okindegian "barra bat"
eskatu ta "no te **entiendo**"
batzuek ez ulertzeko
enpeñatzen dira **sendo**.


Ta ogia ezin izan
dudanez euskaraz **hartu**,
goxoki dendan euskaraz
eskatzen ez naiz **ausartu**.

Dendariak antzeman dit:
"Ez al dakizu **euskara**?"
Sorpresa hau gozokiak
baino **gozoagoa da**!

Batzutan pentsatu arren
ez daukadala **indarrik**
holakotan sentitzen dut
ez nagoela **bakarrik**!

Gure herrian euskaldun
garenez hainbeste **lagun**,
ilusioak batu ta
piña bat egin **dezagun**!

GUK EUSKARAZ



Doinua:

Egin dezagun eskolako ekitaldirako gure sorta.
Lehenik, pentsa dezagun sortaren egitura. Zer-nolako mezuak eman nahi ditugu?

Sortaren egitura, bertsoz bertso

1 _____

2 _____

3 _____

4 _____

5 _____

6 _____

7 _____

8 _____

Bertso sorta

